

○按ズルニ、刑部直眞刀自畔ノ事ハ、本書ノ承和十三年五月條ニ重載シ、類聚國史卷五十四ニモ亦此ヲ同年ノ事トス、從フベキニ似タリ、

〔文德實錄〕六、齊衡元年三月癸巳、賜下野國節婦秦部總成女爵二級、復終其身、旌表門閭、總成女者、秦部正月滿之妻也、性至謹篤、正月滿亡後、撫養遺孤、不復再醮、持節彌固、常修功德、追資其夫、兼願及一切衆生、國內稱之、五月己酉、賜加賀國節婦和邇部廣刀自女爵二級、廣刀自女年十四、適山城國人秦眞勝、眞勝亡後、廬於家側、于今卅餘年、追慕其夫、言及哀泣、

〔三代實錄〕八、貞觀六年二月五日壬戌、攝津國武庫郡節婦日下部連氏成賣、年十六、適右京人文室眞人武庫麻呂、歷二十七年、武庫麻呂死、氏成賣居喪有禮、事死如生、日不再食、遂不改醮、詔叙位二階、免戶內田租、終身勿事、卽表門閭、以旌貞操、

〔三代實錄〕十、貞觀七年三月廿八日己酉、近江國言伊香郡人石作部廣繼女、生年十五、始以出嫁、三十七失其夫、常守墳墓、哭不絕聲、專期同穴、無心再嫁、量其意操、可謂節婦、勅宜叙二階、免戶內租、卽表門閭、

〔三代實錄〕十三、貞觀八年九月廿日壬戌、丹波國何鹿郡人漢部福刀自、伉儷亡後、歷二十二年、獨居虛室、守節、是真節婦、特加優獎、叙位二階、免戶內租、以表門閭、

〔三代實錄〕二十七、貞觀十七年十月八日丁巳、但馬國節婦美合郡人日置部小手子、叙位二階、小手子年十六、適權大領外從八位上日下部良氏、年二十九夫去、守節不移、無意再醮、及至晚齡、執志彌固、鄉黨推敬、故褒美焉、

〔三代實錄〕四十八、仁和元年十二月廿九日己卯、節婦加賀國加賀郡大野鄉人道今古、授位二階、免戶內田租、表其門閭、以旌貞節也、今古生年十三、適故前加賀權掾大神高名、經二十餘年、高名身死、今古廬于墳側、歷年不去、哭泣之聲、日夜不斷、今古母箭集清河子年二十一、始適於人、其夫死後、不更再醮、